

**«ԵՐԵՎԱՆԻ ԲԱՂԱՔԱՅԻՆ ԶԱՐԳԱՑՄԱՆ
ՆԵՐԴՐՈՒՄԱՅԻՆ ԾՐԱԳՐԻ ՀՈՂԻ ՕՏԱՐՄԱՆ ԵՎ
ՏԱՐԱԲՆԱԿԵՑՄԱՆ ՇՐՋԱՆԱԿԸ ՀԱՍՏԱՏԵԼՈՒ ՄԱՍԻՆ»
ՀՀ ԿԱՌԱՎԱՐՈՒԹՅԱՆ ՈՐՈՇՄԱՆ ՆԱԽԱԳԻԾ**

ՆԱԽԱԳԻԾ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ

ՈՐՈՇՈՒՄ

« » _____ 2024 թվականի N ____ - Ն

**ԵՐԵՎԱՆԻ ԲԱՂԱՔԱՅԻՆ ԶԱՐԳԱՑՄԱՆ ՆԵՐԴՐՈՒՄԱՅԻՆ ԾՐԱԳՐԻ` ՀՈՂԻ ՕՏԱՐՄԱՆ
ԵՎ ՏԱՐԱԲՆԱԿԵՑՄԱՆ ՇՐՋԱՆԱԿԸ ՀԱՍՏԱՏԵԼՈՒ ՄԱՍԻՆ**

Ղեկավարվելով ՀՀ Սահմանադրության 146-րդ և 153-րդ հոդվածների դրույթներով և հիմք ընդունելով Հայաստանի Հանրապետության և Ասիական զարգացման բանկի միջև 2023 թվականի նոյեմբերի 27-ին ստորագրված` «Երևանի քաղաքային զարգացման ներդրումային ծրագիր» N 4371-ARM վարկային համաձայնագիրը և Երևանի քաղաքապետարանի և Ասիական զարգացման բանկի միջև 2023 թվականի նոյեմբերի 27-ին ստորագրված` «Երևանի քաղաքային զարգացման ներդրումային ծրագրի» (այսուհետ` Ծրագիր) համաձայնագիրը, Հայաստանի Հանրապետության կառավարությունը որոշում է.

1. Հաստատել Երևանի քաղաքային զարգացման ներդրումային ծրագրի հողի օտարման և տարաբնակեցման շրջանակը (այսուհետ` ՀՕՏԾ)` համաձայն NN 1 և 2 հավելվածների:
2. Հայաստանի Հանրապետության աշխատանքի և սոցիալական հարցերի նախարարին, Կադաստրի կոմիտեի ղեկավարին, Պետական եկամուտների կոմիտեի նախագահին` Երևանի քաղաքապետին էլեկտրոնային տարբերակով այդ մասին հարցում ստանալուց հետո ոչ ուշ, քան երեք աշխատանքային օրվա ընթացքում սահմանված կարգով տրամադրել և (կամ) հասանելի դարձնել Ծրագրի ներքո ՀՕՏԾ-ին վերաբերող անհրաժեշտ տեղեկատվությունը, մասնավորապես`
 - Հայաստանի Հանրապետության աշխատանքի և սոցիալական հարցերի նախարարության իրավասությունների մասով` ազդեցության ենթակա և անապահովության գնահատման համակարգում հաշվառված և նպաստառու տնային տնտեսությունների մասին.
 - Կադաստրի կոմիտեի իրավասությունների մասով`

ա. Հայաստանի Հանրապետության կառավարության 2023 թվականի օգոստոսի 11-ի թիվ 1357-Ն որոշման հավելված 2-ով սահմանված տարածքի (այսուհետ` Տարածք) կադաստրային քարտեզը,

բ. Տարածքում ընդգրկված գույքերի սեփականատերերի, անշարժ գույքի նկատմամբ իրավունքների պետական գրանցման վկայականների, գրանցված սահմանափակումների, ինչպես նաև՝ տարածքում հաշվառված ինքնակամ կառույցների մասին.

- Պետական եկամուտների կոմիտեի իրավասությունների մասով՝

ա. Տարածքում առկա իրավաբանական անձանց և անհատ ձեռնարկատերերի կողմից գործունեության բոլոր տեսակների մասով՝ նախորդող չորս տարիներին ներկայացված ամսական, եռամսյակային և տարեկան հաշվարկներում/հաշվետվություններում արտացոլված՝ ստացված եկամտի, պահված հարկերի և այլ տեղեկատվության մասով,

բ. Տարածքում ընդգրկված գույքերի՝ ֆիզիկական անձ հանդիսացող սեփականատերերի կամ նրանց հարկային գործակալների կողմից՝ նախորդող չորս տարիներին հաշվարկված սոցիալական վճարումների մասին՝ ամսական, եռամսյակային և տարեկան կտրվածքով:

3. Սույն որոշման հավելվածները հաստատել հայերեն և անգլերեն՝ սահմանելով, որ Ծրագրի իրականացման շրջանակներում տարընկալումների կամ հակասությունների դեպքում գերակայող է անգլերեն տեքստը:
4. Հայաստանի Հանրապետության տարածքային կառավարման և ենթակառուցվածքների նախարարին՝ համագործակցելով Երևանի քաղաքապետի հետ՝ սույն որոշումն ուժի մեջ մտնելուց հետո մինչև 2024 թվականի հոկտեմբերի 30-ը Հայաստանի Հանրապետության կառավարության հաստատմանը ներկայացնել Ծրագրի հողի օտարման և տարաբնակեցման ծրագիրը:
5. Սույն որոշումն ուժի մեջ է մտնում պաշտոնական հրապարակմանը հաջորդող օրը:

Հայաստանի Հանրապետության

վարչապետ

Ն. Փաշինյան

2024 թվականի դեկտեմբերի []

Երևան